

四庫全書

集部

欽定四庫全書

石倉歷代詩選卷一百三十七

明 曹學佺 編

宋詩十四

魏野

冬日書事

十月天不暖前村到豈能閒聞啄木鳥疑是打門僧壞
砌平山雪空堂照瀑冰晚來因出戶方始斲攜藤

書友人屋壁

達人輕祿位居處傍林泉洗硯魚吞墨烹茶鶴避煙
閒惟歌聖代老不恨流年靜想閒來者還應我最偏

竹玦環

誰製破筠根還同一氣分吉凶終在我翻覆謾勞君
酒欲祈先酌香因擲更焚吾嘗學丘禱懶把祝云云

上知府寇相公

文武稟全才何人更可陪有官居鼎鼐無地起樓臺
聖

主詩方和親王狀始迴鎮臨求二陝調變輟三台鳳閣
頒重去龍旌暫擁來下車三度雨上事數聲雷未暇瞻
珪壁先蒙話草萊幾思趨相府恐懼復徘徊

閒居書事

無才動聖君養拙住山村臨事知閒貴澄神覺道尊成
家書滿屋添口鶴生孫仍喜多時雨經春免灌園

述懷

東郊魏仲先生計只隨緣任懶自掃地更貧誰怨天有

名間富貴無事小神仙不覺流光速身將半百年

春日述懷

春暖出茅亭攜筇傍水行易譖馴鹿性難辨鬪鷄情妻
喜栽花活兒跨鬪草羸翻嫌我慵拙不解彊謀生

暮秋間望

水閣間登望郊原欲刈禾壞簷巢燕少積雨病蟬多砧
隔寒溪擣鐘隨曉吹過扁舟何日去江上負煙蓑

秋霽草堂間望

草堂高迥勝危樓時節殘陽向晚秋野色青黃禾半熟
雲容黑白雨初收依依永巷聞村笛隱隱長河認客舟
正是詩家好風景懶隨前輩却悲愁

秋日登樓客次懷張軍進士

聞說飄零亦異鄉登樓吟望益悲涼當時欲別言難盡
他日相逢語更長蟬噪水村千萬樹鴈過雲岫兩三行
明朝策蹇還無定空凭危欄到夕陽

早起

夜長久待得晨興耽睡童猶喚不應燒葉爐中無宿火
讀書窗下有殘燈臨堦短髮梳和月傍岸衰容洗帶冰
應被巢禽相怪訝尋常日午起慵能

上王相公

聖朝宰相年年出公在中書十二秋西祀東封俱已了
好來相伴赤松遊

尋隱者不遇

尋真誤入蓬萊島香風不動松花老採芝何處未歸來

白雲滿地無人掃

啄木

爪利背還剛殘陽啄更忙千林蟲如盡一腹餒何妨形
小過槐陌聲高近草堂豈能同燕雀惟解占梁高

附種放詩

夏日山居

陰陰林木靜寂寂無人境紅綻紫葳香嵐沈玉膏冷看
雲時獨坐慎事常中省何客馭風來新篁動疎影

諭蒙詩

大盈卑百瀆自成浮天潯崇丘下累塊竟為蔽日深王者在謙小夙推堯禹心拜言尊賢仁慎德弃珠金自滿九族散匪驕百善尋炳茲夏商鑒滅國因誇淫

酬陳齋民見寄

竹扉常晝掩幽僻置身安自委漁樵分因思出處難周庭方設燎漢將尚封壇莫問漁樵意人寰事萬端

附曹汝弼詩

歆之休寧松蘿山人曹處士名汝弼字夢得其先
青州人南唐時徒歆詩一百五十首傳世曰海寧
集舒職方雄為序中子屯田郎中炬登第其後
以進士仕者六人以恩蔭仕數十人贈職方員外
郎今曹君涇清其九世孫也天禧祥符間高蹈
有聲與林和靖魏野潘閬諸詩亦似之

中秋月

年年相對賞永夜坐吟牀衆望自疑別孤高非異常園

林分淨影臺榭起餘光誰似蟾宮客得攀仙桂香

喜友人過隱居

忽向新春裏間過隱士家旋收松上雪來煮雨前茶禽
換新歌曲梅粧隔歲花應慙非適者難久在煙霞

懷寄披雲峰誠上人

院高窮木盛野極靜無言險路通巖頂香泉出石根微
風飄磬韻幽鳥啄苔痕常記相留夜秋堂共聽猿

再寄

江城從別後聞說在松間度日長扃戶終年不下山靜
為詩所役閒免事相關應喜雲邊客冥搜鬢未斑

贈披雲峰岳長老

禪外掩松扃閒眠度歲陰雨侵香篆濕苔長屐痕深水
在銅餅冷雲歸玉磬沈前山有靈藥時策杖藜尋

贈僧

一從叨命服乘興入天台院接石橋住門臨瀑布開松
間應獨坐雪裏更誰來時復攜藜杖看雲上古臺

附張維詩

太守馬太卿會六老于南園

賢侯美化行南國華髮欣欣奉宴娛政績已聞同水薤
恩輝遂喜及桑榆休言身外榮名好但恐人間此會無
他日定知傳好事丹青寧羨洛中圖

庭鶴

戢翼盤桓傍小庭不無清夜夢煙汀靜翹月色一團素
閒咏苔錢數點青終日稻梁聊自足滿前鷄鶩漫相形

已隨秋意歸詩筆更與幽栖上畫屏

玉蝴蝶花

雪朶中間蓓蕾齊驟聞尤覺繡工遲品高多說瓊花似
曲妙誰將玉笛吹散舞不休零晚樹團飛無定撼風枝
漆園如有須為夢若在藍田種更宜

歸燕

社燕秋歸何處鄉羣雛齊老稻青黃猶能時暫栖庭樹
漸覺稀疏度苑牆已任風庭下簾幙却隨煙艇過瀟湘

前村認得安巢所應免差池棟杏梁

聞砧

遙野空林砧杵聲淺沙栖雁自相鳴西風送響暝色靜
久客感秋愁思生何處征人移塞帳即時新月落江城
不知今夜搗衣曲欲寫秋閨多少情

宿後陳庄

臘凍初開苔水清煙村遠郭漫吟行灘頭斜日鳬鷺隊
枕上西風鼓角聲一棹寒燈隨夜釣滿犁膏雨趁春耕

誰言五福仍須富九十年餘樂太平

貧女

蒿簪掠髮布裁衣水鑑雖明亦懶窺
數畝秋禾滿家食一機官帛幾梭絲
物為貴寶天應與花有秋香春不知
多少年來豪族女總教時樣畫蛾眉

孤帆

江心雲破處遙見去帆孤浪濶疑升
漢風高若泛湖依微過遠嶼彷彿落
平蕪莫問來舟客利名同一途

送丁遜秀才赴舉

鵬去天池衆翼隨風雲高處約先飛青袍賜宴出關近
帶取瓊林春色歸

孫覺華老序云富貴而壽考者人情之所甚慕
貧賤而夭短者人情之所甚哀然有得於此者
必遺於彼故寧處康強之貧壽考之賤不願多
藏而病憂顯榮而夭短也贈尚書刑部侍郎張
公諱維吳興人少年學書貧不能卒業去而躬

耕以為養善教其子至於有成平居好詩以吟
咏自娛浮游閭里上下於溪湖山谷之間遇物
發興率能成章不事雕琢之巧采繪之華而雅
意自得徜徉閒肆往往與異時處士能詩者為
輩蓋非無憂於中無求於世其言不能若是也
公不出仕而以子封至四品亦可謂貴不治職
而受祿養以終其身亦可謂富行年九十有一
可謂壽考夫享人情之所甚慕而違其所哀無

憂無求而見之吟咏則其自得而無怨懟之辭
蕭然而有沈澹之思其然宜哉公卒十八年公
子尚書都官郎中先亦致仕家居取公生平所
自愛詩十首寫之縑素號十詠圖傳示子孫而
以序見屬子既愛侍郎之壽都官之孝為之序
而不辭都官字子野蓋其年八十有二云

周密齊東野語云宋有兩張先皆字子野其一
博州人天聖三年進士歐陽公為作墓誌其一

天聖八年進士則吳興人也二人名姓偶同又
適同時不可不知也陳振孫詩曰平生聞說張
三影十詠誰知有乃翁遐想盛時生恨晚恍如
身在畫圖中十詠有宿清江小舍一首破損僅
存一句菰葉青青綠荇薺云

石倉歷代詩選卷一百三十七

欽定四庫全書

石倉歷代詩選卷一百三十八

明 曹學佺 編

宋詩十五

林逋

閔師見寫陋容以詩奉答

顧我丘壑人煩師與之寫北山終日懸風調一何野林
僧忽焉至欲揖頌方罷復有條上猿驚窺未遑下

監郡太博惠酒及詩

塵事久謝絕園廬方晏陰鏗然郢中唱伸玩清人心況
復對尊酒百慮安能侵何以比交情松桂寒蕭森

送牛秀才之山陽省兄

之子詠陟岡別我歲時晏後夜失羣鶴高天著行鴈楚
山遠近出江樹青紅間尊酒無足辭離愁滿行盼

湖樓晚望

湖水混空碧憑闌凝睇勞夕寒山翠重秋淨鴈行高遠

意極千里浮生輕一毫叢林數未遍香靄隔漁舫

秋日西湖間泛

水氣并山影蒼茫已作秋林深喜見寺岸靜惜移舟疎
葦先寒折殘虹帶夕收吾廬在何處歸興起漁謳

上湖間泛艤舟石函因過下湖小墅

平臯望不極雲樹遠依依及向扁舟泊還尋下瀨歸青
山連石埭白水入柴扉多謝提壺鳥留人到落暉

西湖舟中值雪

浩蕩彌空濶霏霏接水濱舟移忽自却山近未全分凍
軫間清泛溫爐接薄薰悠然詠招隱何許歎離羣

湖村晚興

滄洲白鳥飛山影落晴暉映竹犬初吠弄船人合歸水
波隨月動林翠帶煙微寺近疎鐘起蕭然還掩扉

湖山小隱

園井夾蕭森紅芳墮翠陰晝岩松鼠靜春塹竹鷄深歲
課非無秫家藏獨有琴顏原遺事在千古壯閒心

小隱自題

竹樹繞吾廬清深趣有餘
鶴閒臨水久蜂懶採花疎
酒病妨開卷春陰入荷鋤
嘗憐舊圖畫多半寫樵漁

小隱

門徑獨蕭然山林屋舍邊
水風清晚釣花日重春眠
苒苒苔衣滑磷磷石子圓
人寰諸洞府應合署閒仙

北山晚望

晚來山北景圖畫亦應非
村路飄黃葉人家濕翠微
樵

當雲外見僧向水邊歸一曲誰橫笛簫葭白鳥飛

中峯

中峯一徑分盤折上幽雲夕照前村見秋濤隔嶺聞長
松含古翠衰藥動微薰自愛蘇門嘯懷賢思不羣

出曹州

詩懷動歎嗟驢立帽陰斜雨灤生新醺茅叢夾舊槎午
煙昏獨店岡路透誰家幾日江南興扁舟泊岸沙

盱眙山寺

下傍盱眙縣山崖露寺門疎鐘過淮口一徑入雲根竹
老生虛籟池清見古源高僧拂經榻茶話到黃昏

翠微亭

亭在江干寺清涼更翠微秋塔響松子雨壁上苔衣絕
境長難得浮生不擬歸旅懷何計是西崦入斜暉

埜城寺水亭

金井前朝事林僧問不知綠苔欺破閣白鳥占閒池清
楚曾經晉荒唐直到隋南廊一聲磬斜照獨凝思

中峯行藥却望北山因而成詠

拂石玩林壑曠然空色秋歸雲帶層巖疎葦際滄洲固
自堪長往何為難久留庶將濠濮想聊作剡中遊

和梅聖俞雪中同虛白上人來訪

湖上玩佳雪相逢惟道林早煙村意遠春漲岸痕深地
僻過三徑人間試五禽歸棹有餘興寧復比山陰

和朱仲方送然社師無為還歷陽

歸路過東關行行一錫間破林霜後月孤寺水邊山頂

笠衝殘葉腰裝歇暮灣香燈舊吟社清思逐師還

送昱師赴請姑蘇

同載闔閭人衣囊覆氎巾新煙赤岸暝融雪太湖春鐘
遠移齋候香遲上定身當知舉如意寶地雨花頻

送越倅楊屯田赴闕

越中分治罷山水別來初詩景多留石船痕半載書野
程江樹遠公讌郡樓虛待赴嚴徐台清風滿直廬

送思齊上人之宣城

林嶺藹春暉程程入翠微
泉聲落坐石花氣上行衣
詩古情懷澹禪高論語稀
蕭閒水西寺駐錫莫忘歸

洞霄宮

大滌山相向華陽路暗通
風霜唐碣久草木漢祠空
劍石苔花碧丹池水氣紅
幽人天柱側茅屋灑松風

送僧休復之京師

金錫指歸鴻田衣獵曉風
春江片席遠松月一房空
新句別離後舊山魂夢中
到京當袖刺館閣盡名公

寄思齊上人

松下中峯路懷師日日行
靜鐘浮野水深寺隔春城閣
掩茶煙晚廊迴雪溜清當期相就宿詩外語無生

寄清曉閣黎

前時春雪晴林壑趣彌清
幾憶山陰講兼忘谷口耕
樹叢歸夕鳥湖影浸寒城
還肯重相訪柴門掩杜蘅

寄曹南任懶夫

關門却坐忘一爐隱居香
午懶懷泉瀑秋耕負晚岡道

深玄草在貧久褐衣荒料得新交者微吟為楚狂

詩壁

數題留粉堵還勝在屏風坐讀恭慵下眠看酒恰中僧
房秋色冷山驛晚陽紅更有棲遲句家徒一畝宮

宿洞霄宮

秋山不可盡秋思亦無垠碧澗流紅葉青林點白雲涼
陰一鳥下落日亂蟬分此夜芭蕉雨何人枕上聞

湖上隱居

湖水入籬山遠舍隱居應與世相違
閒門自掩蒼苔色
過客時驚白鳥飛
賣藥比常嫌有價
灌園終亦愛無機
如何天竺林間路
猶到秋深夢翠微

湖上晚歸

卧枕船舷歸思清
望中渾恐是蓬瀛
橋橫水木已秋色
寺倚雲峰正晚晴
翠羽濕飛如見避
紅蕖香嫋似相迎
依稀漸近誅茅地
雞犬林蘿隱隱聲

湖上初春偶作

梅花開盡臘亦盡春暖便如寒食天氣色半歸湖岸柳
人家多上郭門船文禽相並映短草翠欲生浮嫩煙
幾處酒旗山影下細風時已弄繁絃

西湖春日

爭得才如杜牧之試來湖上輒題詩春煙寺院敲齋鼓
夕照樓臺卓酒旗濃吐雜芳薰巖崿濕飛雙翠破漣漪
人間幸有蓑兼笠且上漁舟作釣師

西巖夏日

蕙帳蕭閒掩弊廬子真巖石坐來初為鷺野鳥巢間乳
懶過隣僧竹裏居新溜迸涼侵久話晚雲浮潤上殘書
何煩強捉白團扇一柄青松自有餘

夏日即事

石枕涼生菌閣虛已應梅潤入圖書不辭齒髮多衰病
所喜林泉有隱居粉竹亞梢垂薄露翠荷差影聚遊魚
北窗人在羲皇上時為淵明一起余

孤山後寫望

水墨屏風狀總非作詩除是謝玄暉谿橋杳杳穿黃葉
樵斧丁丁研翠微返照未沈僧獨往長煙如淡鳥橫飛
南峯有客鋤園罷閒倚籬門忘却歸

山閣偶書

遶舍青山看未足故穿林表架危軒但將松籟延佳客
常帶嵐霏認遠村吳榜自能凌晚汰湘纍何苦屬芳蓀
餘生多病期怡養聊此棲遲一避喧

孤山寺

雲峯水樹南朝寺，祇隔叢篁作並隣。
破殿靜披甍白古，齋房閒試酪奴春。
白公睡閣幽如畫，張祐詩牌妙入神。
乘興醉來拖木屐，翠苔蒼蘚石磷磷。

西湖

混元神巧本無形，匠出西湖作畫屏。
春水淨于僧眼碧，晚山濃似佛頭青。
欒櫨粉堵搖魚影，蘭杜煙叢閣鷺翎。
往往鳴榔與橫笛，細風斜雨不堪聽。

采石山

危閣閒登日漸曛畫屏晴雨枕江濱
秋稜瘦出無多寺古翠濃連一半雲
坐卧不拋輸釣叟往來長見屬鷗羣
翻然却怪宣城守是甚將移李白墳

園池

一徑蘅門數畝池平湖分漲草含滋
微風幾入扁舟意新霽難忘獨繭期
島上鶴毛遺野跡岸傍花影動春枝
永嘉謝夢曾今在獨愧憑闌負碧漪

園廬

柴關寒井對蕭辰自愛棲遲近古人間草滿庭終勝俗
好書堆案轉甘貧橋邊野水通漁路籬外青山見寺隣
懶為躬耕詠梁甫吾生已是太平民

安福縣途中作

詩景紛拏且按鞭壞橋危磴已鳴泉雲根野店多沽酒
山崦人家亦種田谷鳥驚啼衝宿雨野梅愁絕閉寒煙
玉梁閣皂堪行徧回得臨江即上船

雪

皓然窓戶曉來新畫軸碑廳絕點塵
洛下高眠應有道
山陰清興更無人寒連水石鳴漁墅
猛共松篁壓寺隣
酒渴已醒時味薄獨援詩筆得天真

山舍小軒有石竹二叢閤然秀發因成

青帘有酒不妨賒素壁無詩未足誇
所重晚芳聊在目
可關秋色易為花深枝冉冉粧溪翠
碎片英英剪海霞
莫管金錢好行市寂寥相對是山家

送馬程知江州德安

酒酣無復耿離腸一路之官盡水鄉公解寒生對廬阜
客帆風定泊潯陽陂涵洲渚初收潦露浥蒹葭未作霜
到日何人先刺謁二林開士在琴堂

送文光師遊天台

天姥山深搖錫杖野芳春翠共葳蕤松門過水無重數
石壁看霞到盡時間避鳥啼應作觀忽聞人跡自留詩
秦中河朔嘗遊覽莫恨此方行脚遲

集賢李建中工部嘗以七言長韻見寄感存懷

沒因用追和

清絕門牆冷似冰
野人懷別昔曾登
新題對雨分蕭寺
舊夢經秋說杜陵
貧典郡符資月給
老持臺憲減霜稜
開元文字鍾王筆
惆悵臨風一燼燈

酬畫師西湖春望

笛聲風煖野梅香
湖上憑闌日漸長
一樣樓臺圍佛寺
十分煙雨簇漁鄉
鷗橫殘葑多成陣
柳映危橋未著行
終約吾師指芳草
靜吟閒步岸華陽

西湖孤山寺後舟中寫望

天竺橫分景色寬，孤山背後泊船看。
林藏野路秋偏靜，水映漁家晚自寒。
拂拂煙雲初淡蕩，蕭蕭蘆葦半衰殘。
汀鴻數點誰驚起，書破晴雲粉字乾。

聞靈蛟師自信州歸越以詩招之

天師蒼翠橫金錫，地藏清涼掩竹扉。
千里白雲隨野步，一湖明月上秋衣。
詩尋靜語應無極，琴弄寒聲轉入微。
我亦孤山有泉石，肯來松下共忘機。

和人病起

展轉匡牀乍起來
縹囊緗帙亦慵開
三年一尉湖山在
誰識神仙本姓梅

送陳日章秀才

閒却清尊掩縹囊
病來無故亦淒涼
江南春草舊行路
因送歸人更斷腸

送大方師歸金陵

渺渺江天白鳥飛
石城秋色送僧歸
長干古寺經行了

為到清涼看翠微

鳴臯

臯禽名祇有前聞孤引圓吭夜正分一唳便驚寥泬破
亦無閒意到青雲

自作壽堂因書一絕以誌之

湖上青山對結廬墳前秋色亦蕭疎茂陵他日求遺稿
猶喜曾無封禪書

石倉歷代詩選卷一百三十八

欽定四庫全書

石倉歷代詩選卷一百三十九

明 曹學佺 編

宋詩十六

蘇舜欽

永叔月石硯屏歌

日月行上天
下照萬物根
向之生榮背
則死故為萬
物生死門
東西兩交征
晝夜不暫停
胡為號山石
留此皎

月痕常存桂樹散疎陰有若圖畫成永叔得之不能曉
作歌使我窮其源且疑月入此山中分此兩曜三處明
或云蟾蜍好溪山逃遁出月不可闕浮波穴石恣所樂
常娥孤坐初不覺玉杵夜無聲無物來搗藥常娥驚推
輪下天自尋捉遠地掀江踏山岳二物驚奔不復見留
此玉輪之迹在青壁風雨不可剝此說亦詭異余知未
精確物有無情自相感不間幽微與高邈老蚌吸月月
降胎水犀望星星八角形霞爍石變靈砂白虹貫巖生

美璞此乃西山石久為月照著歲久光不滅遂有團圓
月寒輝籠籠出輕霧坐對不復嗟殘缺蝦蟇從汝惡背
吻可能食此清光沒玉川子若在見必喜不徹此雖石
中時有靈光發土怪山鬼不敢近照之僵仆肝腦裂有
如君上明下燭萬類無遁形光艷百世無虧盈

中秋松江新橋對月和柳令

月晃長江上下同畫橋橫絕冷光中雲頭灩灩開金餅
水面沈沈卧綵虹佛氏解為銀世界仙家多住玉華宮

地雄景勝言難盡但欲追隨乘曉風

春睡

別院簾昏捲竹扉朝醒未解接春暉身如蟬蛻一榻上
夢似楊花千里飛嗒爾暫能離世網陶然直欲見天機
此中有德堪為頌絕勝人間較是非

覽含元殿基因想昔時朝會之盛且感其興廢
在昔朝元日千門動地來方隅正無事輔相復多才仗
下簪纓肅天中繖扇開皇威瞻斗極曙色辨崔嵬赤案

波光卷鳴鞭電尾回熊羆驅禁衛雨露覆蘭臺橫賜頌
中帑窮奢役九垓只知營國用不畏屈民財翠輦還移
幸旻天未悔災羣心尊困獸回首變寒灰曾以安無慮
翻令世所哀行人看碧瓦獨鳥下蒼苔雖念陵為谷遙
知禍有胎青編遺跡在此地亦悠哉

田家詞

南風霏霏麥花落豆田漠漠初垂角山邊夜半一犁雨
田父高歌待收穫雨多蕭蕭蠶簇寒蠶婦低眉憂繭單

人生多求復多怨天公供爾良獨難

夏意

別院沈沈夏簟清石榴開徧透簾明樹陰滿地日停午
夢覺流鶯時一聲

泊舟

春陰垂野草青青時有幽花一樹明晚泊孤舟古祠下
滿川風雨看潮生

望太湖

杳杳波濤閱古今四邊無際莫知深潤通曉月為清露
氣入霜天作暝陰笠澤鱸肥人膾玉洞庭橘熟客分金
風烟觸目相招引聊為停橈一楚吟

附潘閨詩

敘吟

高吟見太平不恥老無成髮任莖莖白詩須字字清搜
疑滄海竭得恐鬼神驚此外非關念人間萬事輕

夏日宿西禪

此地絕炎蒸深疑到不能夜涼知有雨院靜若無僧枕
潤連雲榻窓明照佛燈浮生賤骨役時日恐難勝

歲暮自桐廬歸錢塘晚泊漁浦

久客見華髮孤棹桐廬歸新月無朗照落日有餘輝漁
浦風浪急龍山煙火微時驚沙上雁一一背南飛

秋日題瑯琊山寺

巖下多幽景且無塵事喧鐘聲晴徹郭山色曉當門深
洞藏泉脉懸崖露樹根更期來此宿絕頂聽寒猿

落葉

片片復落落園林漸向空
幾番經夜雨一半是秋風
靜擁莎階下間堆蘚徑中
谷松與巖檜寧共此時同

渭上秋夕間望

秋夕滿秦川登臨渭水邊
殘陽初過雨何樹不鳴蟬
極浦涵秋月孤帆沒遠煙
漁人空老盡誰似太公賢

陶弼

兵器

五代乏真主奸雄紛僭偽橫磨濶刀劒白日相篡弑我
宋皇太祖潛德動天意神物既有歸乃即皇帝位不患
兆民樂不怒諸侯畏顛倒執玉帛奔走恐後至獨有陰
山北時時寇邊地天子赫斯怒大警巡澶衛射殺古賢
王遂斷匈奴臂心歸帖然服結好同昆弟卒間喜夜歌
將老貪春睡自此為太平恍逾三十歲戎吳乘我間南
馳賀蘭騎陽關久夜開樞朽不可閉陣雲起秦雍殺氣
橫涇渭使臣股慄奏宰相嗔目議僉曰亟發兵豎子坑

甚易倉皇築邊壘未戰力先瘁逼邊開庫兵土蝕鋒鉞
脆防秋採舊屯推轂謀新寄舊屯老且死少者無實藝
良由不訓練手足迷擊刺新寄將家子從小生富貴六
韜未嘗讀口但知肉味師復從中御進退由閭寺權輕
號令冗兩戰無遺類曹公棄七軍晉人獲三帥吾兵自
此喪有詔新其製此器不預設一旦何從致朝廷急郡
縣郡縣急官吏官吏無他術下責蚩蚩輩耕牛拔筋角
飛鳥禿翎翅簞截會稽空鐵烹葦山碎供億稍後期鞭

朴異他罪愁氛擁太虛
霽景晝冥晦我聞郭汾陽
料敵多奇異單筆諭突厥
番酋膝雙墜又聞李西平
臨戎有英氣身著紅錦袍
懷光肝膽碎是知用兵術
在人不在器君耳舜高聰
君目舜明視願採謀畧長
勿倚干戈銳

公安縣

門沿大堤入路趨淺莎行
樹短雲根拔山窮地勢頹
孤舟難泊岸遠水欲沈城
半夜呼津口煙中荻火明

送趙樞寺丞宰虔化縣

路入虔雲去如何輕解攜人煙五嶺北星斗大江西南
雪梅花樹晴雷贛石溪青衫欲無淚不奈鷓鴣啼

出嶺題石灰鋪

馬渡嚴關口生歸喜復嗟天文離巷舌人影背含沙江
勢一再曲梅梢三四花登高休問路雲際是吾家

重到陽關

五管新多事輕車屢往還勤勞成白髮故舊是青山樹
色纔分楚江聲未出蠻自慚迎候少無惠及孤鰥

吟石

已下俱
在欽州

守邊無一事江上得閒吟
醉嚙歌微出狂書墨不深
潮痕沒高岸月色透疎林
此意無人解宵分淚滿襟

東湖

寧越佳山水東湖帶郡城
月天高寺影春雨一橋聲
石上青蒲合沙中白鳥橫
天涯正寥落獨往若為情

西湖

寧越佳山水西湖似浙城
佳多天竺子潮欠海門聲
路

向林梢轉天隨野色橫從茲樓泊者無復渡江情

題霞溪驛

今屬全州

歌聲野色中人樂歲時豐暑雨陰陽雜秋田早晚同嶺
雲無烈日江樹足涼風自指香山語前村有路通

登邕州南城臺

江國家書少秋臺閒草生無人來遠渡盡日上高城落
照懸漁市孤煙起戍營東籬故園菊又向酒中頌

登崑崙臺

落照古城隅邊風動隼旗久間忘戰畧多病熟醫書白
髮隨年短新情與世疎桃花春水起還釣舊溪魚

題陽朔縣舍

石壁高深遶縣衙不離牀衽自煙霞民耕紫芋為朝食
僧煮黃精代晚茶瀑布聲中窺案牘女蘿陰裏勸桑麻
欲知言偃絃歌化水墨屏風數百家

天涯亭

雨色絲絲風色驕天涯亭上覺魂銷一家生意付秋瘴

萬里歸心隨暮潮
兵送遠人還海界
吏申遷客入津橋
山公對此聊酣飲
怕見醒來兩鬢凋

途次葉縣觀千葉桃花

三月官桃滿上林
花開千葉費春心
葉公城外襄河北
一樹無人色更深

登潮月亭

渡頭人語知潮上
下看南江東北流
試引輕帆學歸去
茶山溪淺却回舟

對花有感

得莫欣欣失莫悲古今人事若花枝
桃紅李白薔薇紫
問著春風自不知

石延年

瀑布

飛勢挂岳頂無時向此傾
玉虹垂地色銀漢落天聲
萬丈寒雲濕千巖暑氣清
滄浪何足羨就此濯塵纓

詠春

一氣回元運恩含萬物深陰陽造端數天地發生心有
信來還逝無私古到今和風激遺暢南轉入薰琴

曹太尉西師

仁者雖無敵王師尚有征獨乘金殿馬都領鐵林兵肅
氣關河暮屯煙部落晴旗光秋燒合甲色夜江橫士喜
擊中鼓虜疑聞後鉦寒踰博望塞春宴隗囂城外使戎
心伏旁資帝道平公還如畫像為贊學班生

贈劉潛歸陶丘

丈夫未大用身與仁義閑可宜更聚散風塵摧厥願君
今歸柯澤路出梁宋間芒碭有吾廬親老待我還羨子
先諧願思親頭鬢斑韶光苦不再溝水長潺湲

金鄉張氏園亭

亭館連城敵謝家四時園色闌明霞窓迎西渭封侯竹
地接東陵隱士家樂意相關禽對語生香不斷樹交花
縱遊會約無留事醉待參橫月落斜

秋夕北樓

秋霽露華清帶水月明天色白連河夜闌澄景生微動
瑟瑟層颿上下波

小桃

生色深紅綬帶長宮簾間在井欄香母家昇上瑤池品
先得春風半面妝

劉敞

小孤山

驚波觸南崖反怒射北壁蒼山與相排所謂小孤石嵒

根萬仞淵聳角千丈碧祠堂豁精嚴行旅進粉澤或云
婦女神盼蠻頗有迹吾知定名意似欲旌介特流俗失
其真傳聞莫開釋先王秩山川禮典有廟食奈何媚於
竈屈已忘正直吾欲為小孤作書解行客復恐不見從
嗟哉世多惑

雜詩效玉川體

毀巢鳳不至竭澤龍不遊賢者有所歸得非龍鳳儔周
公下白屋聖德被九州趙禹謝賓客漢朝以為優澆淳

不相襲用舍何其繆荀徇一身利不為萬姓謀哀彼秋
杜詩死生遺道周

示張直溫

築山必使高鑿井必使深百工戒淺近盛德羞浮沈焉
有尺寸技能棲垂天禽焉有升斗泉能容橫江鱗借茲
諭物理足以開君心隘在容不足弱在力不任大道如
路然固無古與今

雜詩

齊有梁丘據晉有樂王鮒據能愛晏嬰鮒欲殘叔譽二
臣嬖兩朝事君為悅豫景有尚賢志據逆以為助平失
宥善心鮒乃速其去母以據為賢易地則同趣丈夫處
世間必有遇不遇豈無覺者乎正色君亦悟區區嬖幸
徒何忍就朋附

荒田行

大農弃田避征役小農挈家就兵籍良田茫茫少耕者
秋來雨止生荆棘縣官募兵有著令募兵如率官胥慶

從今無復官勸農還逐魚鹽作亡命

逐伯強詞

寶元二年余羈旅淮南醫來言曰今茲歲多疾
疫余因作文以逐伯強伯強厲也能為疫者故
逐之

皇皇上天兮后土浩浩厥生孫繁兮其施甚溥陶陶仲
夏兮草木蕃蕪鳥獸孳息兮我民樂胥我民孔靈兮上
帝是仁天子聖兮百工日新上無秕政兮下無悖人鄰

里其集兮樂哉欣欣伯強何為兮孰畀以政反世五福
兮持極以令我民不怡兮既爽其盛白黑眩瞽兮孰察
其正謂壽反天兮謂康反病仁義無益兮苟且為幸嗟
爾伯強兮其獨何必絕世和氣兮俾民不任上天孔神
兮大德曰生天不可長罔兮民不可久侵天誅誠加兮
安所避雷公驅兮風伯逝嗟爾伯強兮何所詣南有蠻
兮為寇為逋西羌戎兮恃艱自虞天子孔仁兮靡焉畢
屠伯強往兮代天伐誅嗟中國兮不可久留子不去兮

顛倒思予

漁翁

白頭老翁披敗蓑求魚終日罩淮波波深水濶望不絕
網目雖繁能幾何大魚鱣鱔入淵底小魚鯢鮓登網裏
手敲足趺吁可憐何不為網大如天

劉攽

上行書

仕不至二千石賈不至五百萬此事夸者憂而非志士

歎君不見下邳少年受書起幄中運籌制千里功成不
受二萬戶拂衣歸從赤松子君不見計倪半策誅強吳
鷁夷扁舟浮五湖三致千金不自擅至今籍籍宗陶朱
大賢富貴不為己心事邈與常人殊逢時致身如反手
雲蒸龍變無時無君勿愛上書獻賦稱賢豪刺繡倚市
相矜高丈夫昔曾笑徒勞商賈旦旦爭錐刀

茂陵徐生歌

茂陵徐生老且迂一心區區長信書拜章北闕三待報

意欲霍氏安無虞那知世主心不同積惡未極難為功
徙薪曲突事不爾壯侯幾人當受封高岸為谷丘淵移
魯酒之薄邯鄲圍人生快已各以時舊意望君君不思

熙州行

自番請盟供貢職關西二紀剽兵革番人歲來受金帛
地雖國本番不惜帝家將軍勇無敵謀如轉圜心匪席
精誠動天天不隔鑿空借籌皆碩畫賈生屬國試五餌
買臣朔方發十策偏師倏然盡西海一月三捷猶餘力

百蠻解刀慕冠帶五郡掃地開城壁葱嶺陂陀蒲類深
回笑秦并與禹績尚書論功易等差御史行封自明白
武功貶爵十萬金徹侯印組丈二尺奮行過望理自爾
少從進熟來無極憶昔漢武開西域天下騷然苦征役
哀痛輪臺置肥美割弃造陽損斗斛豈知洮河宜種稻
此去涼州皆白麥女桑被野水泉甘吳兒力耕秦婦織
行子雖為萬里程居人坐盈九年食熙州歡娛軍事息
天王聖明丞相直

金陵懷古次韻

虎踞羣山帶遠江為誰興國為誰降
高臺麋鹿看無數廢苑鳬鷺去自雙
萬事朝雲隨逝水百年西日照虛窓
白門酒美東風快笑數英雄盡一缸

春草

春草綿綿未有名水邊原上亂抽縈
似嫌車馬繁華地纔入城門便不生

詠史

自古邊功緣底事多因嬖倖欲封侯不如直與黃金印
惜取沙場白髑髏

絕句

青苔滿地初晴後綠樹無人晝夢餘惟有南風舊相識
徑闌門戶又翻書

寄王荊公

青苗助役兩妨農天下嗷嗷怨相公惟有蝗虫知感德
却隨車騎過江東

題館壁

壁門金闕倚天開
五見宮花落古槐
明日扁舟江海去
却從雲氣望蓬萊

沈括

江南曲

新秋拂水無行跡
夜夜隨潮過江北
西風卷雨上半天
渡口微涼含曉碧
城頭鼓響日脚垂
天際籠煙鎖山色
高樓索莫臨長陌
黃竹一聲無北客
時平田苦少人耕

惟有蘆花滿江白

幽命

山木嘯兮雲幽幽
秣我歸馬兮無為久留
江鼃翔兮雨漫漫
回余車兮水漸慙
仲何為兮中野澹
將洋兮疎駕目遊
兮形留鬱逍遙兮
日下瀉慕兮流觀
舜節兮浩望駟黃
庚兮靡騁旋吾輪
兮馬往不我虛兮
斯辰思何為兮鞅
掌

潤州甘露寺

丞相高齋半草萊
舊時風月滿亭臺
地從日月生時見
眼到江山盡處回
三國是非春夢斷
六朝城闕野花開
心隨潮水漫漫去
流向煙村半日來

歸計

住山人少說山多
空只年年憶薜蘿
不是自心應不信
眼前歸計又蹉跎

姑熟

新晴渡口百花香
石子池頭鴨弄黃
捲幔夕陽留不住

好風將雨過梅塘

仙都

昔封輦路上青山鶴
馭遼天去不還
惟有銀河秋夜月
鼎湖煙浪到人間

歎老

為覓少年心不得
當時感舊已潛然
情懷此日君休問
又老當時二十年

附晁端友詩

字君成无
咎之父也

登多景樓

樓上無窮景樓前正落暉
開軒跨寥廓覽物極纖微
雲破孤峰出潮平兩槳飛
東溟看月上西渡認僧歸
木落吳天遠江寒越舶稀
魚龍隣海窟雞犬隔淮圻
草色迷千古波聲蕩四圍
廢興懷霸業融結想天機
浩浩羣流會沈沈百恠依
登臨真偉觀回首重歎欷

甘露寺

北固山頭寺風煙昔縱觀
卧亭秋石狠環舍海濤寒
越

船樓前聚江風戶外丹最宜清夜月虛閣憶盤桓

早行

馬上雞初唱天涯星未稀驚風時墜笠零露暗沾衣山下疎鐘發林梢獨鳥飛遠峰煙靄澹迤邐見朝暉

馬處厚席上探得早梅

嶺梅何處早雪裏看芳菲北陸寒猶在南枝春已歸曉妝初見妬殘角未成飛引我江頭夢清香憶滿衣

石倉歷代詩選卷一百三十九

欽定四庫全書

集部

石倉歷代詩選卷一百四十一

詳校官庶吉士臣范逢恩

侍讀臣孫球覆勘

總校官進士臣朱 鈐

校對官中書臣方大川

謄錄監生臣馮國柄

欽定四庫全書

石倉歷代詩選卷一百四十

明 曹學佺 編

宋詩十七

歐陽修

自敘

余本漫浪者茲亦漫為官胡然類鴟夷託載隨車轅時
士不俛眉默默誰與言賴有洛中俊日許相躋攀飲德

醉醇耐襲馨佩春蘭平時罷軍檄文酒聊相歡

拜馬澗

昔聞王子晉把袂浮丘仙乘駿于此墮吹笙不復還玉
蹄無迹久澗草但荒煙

二室道

二室對岵羣峰聳峭直雲隨高下起路轉參差碧春
晚桂叢深日際山煙白芝英已可茹悠然想泉石

玉女窻

玉女不可邀蒼崖鬱岵直石乳滴空竇仰見沈寥碧徒
倚難久留桂樹含春色

中峰

望望不可到行行何屈盤一徑林杪出千巖雲下看煙
嵐半明滅落照在峰端

和謝學士泛伊川

久不見南山依然已秋色悠哉川上行復邀城中客木
落山半空川明潦彌積夷猶白蘋裡笑傲清風側極浦

追念遠回峰高易夕

和楊子聰答聖俞月夜見寄

秋露藹已繁迢迢星漢回皎潔庭際月流光依井苔有
客愛涼景幽軒為君開所思不可極但慰清風來

雨中獨酌

老大世情薄掩關外郊原英英少年子誰肯過我門宿
雲屯朝陰暑雨清北軒逍遙一樽酒此意誰與論

別聖俞

車馬古城隅，喧喧分曉色。行人念在塗，居者徒慘惻。薄
宦共羈旅，論交喜金石。薦以朋酒歡，寧知歲月適。人事
坐云變，出處俄乖隔。關山自茲始，揮袂舉輕策。歲暮寒
雲多，野曠陰風積。征蹄踐嚴霜，別酒臨長陌。應念同時
人，獨為未歸客。

答錢寺丞憶伊川

之子問伊川，伊川已春色。綠芷雜青蒲，清溪含白石。山
阿昔留賞，屐齒無遺迹。惟有巖桂花，留芳待歸客。

送劉十三南遊

決決汴河流櫓聲過晚浦
行客問吳山舟人多楚語
春深紫蘭澤夏旱黃梅雨
時應賦登眺聊以忘羈旅

送蟾上人遊天台

昔年在伊洛林壑每相從
對掃竹間榻坐思湖上峯
自言伊洛波每起滄洲憶
今茲道行遊千里東南國
都門汴河上柳色入青煙
流水向淮浦歸人隨越船
東南徧林嶽萬壑新流滿
小桂綠應芳江春日已晚
藹藹赤城

陰依依識古岑一去誰復見石橋雲霧深

送徐生秀州法曹

一笑暫相從結交方恨晚猶茲簿領困况爾東南遠落帆淮口暮採石江洲煖黃鵠可寄書惟嗟雙翅短

立秋有感寄蘇子美

庭樹忽改色秋風動其枝物情未必爾我意先已悽雖恐芳節謝猶懼早涼歸起步雲月暗顧瞻星斗移故人在千里歲月令我悲所嗟事業晚豈惜顏色衰國謀今

謂何邊馬日正嘶

幽谷晚飲

一徑入蒙密已聞流水聲行穿翠篠盡忽見青山橫山
勢抱幽谷谷泉含石泓旁生嘉樹林上有好鳥鳴嘉我
二三友偶同丘壑情環流席高蔭置酒當崢嶸是時新
雨餘日落山更明山色已可愛泉聲難久聽安得白玉
琴寫以朱絲繩

思二亭送光祿謝寺丞歸滁陽

二亭醉翁
豐樂也

吾嘗思醉翁醉翁名自我山林本真性章服偶包裹君
恩未知報進退奚為可自非因讒逐決去焉能果前時
永陽謫衆皆悲坎軻山氣無四時幽花常婀娜石泉咽
然鳴野豔笑而僛賓歡正喧譁翁醉已及我惟茲二三
子嗜好其同頗因歸謝巖石為予刻其左

吾嘗思豐樂魂夢不在身三年永陽郡幽谷最來頻谷
口兩三家山泉為四鄰但聞山泉響豈識山意春春至
換羣物花開思故人故人在憔悴賴之濱人去山

自綠春歸花更新空令谷中叟笑我種花勤

送朱生

萬物各有役無心獨浮雲遂令幽居客日與山雲親
植桂比芳操佩蘭思潔身何必濯於水本無纓上塵

雪晴

悠悠野水來灩灩西溪濶曉日披宿雲荒臺照殘雪風
光變窮臘歲律新陽月凍草意初回綠醅浮可撥人間
樂朋友鳥哢知時節豈止探芳菲耕桑行可閱

竹間亭

高亭照初日竹影涼
蕭森新篁漸解籜
翠色日已深
雨多苔莓綠幽徑無人尋
靜趣久斯得暫來聊解襟
清風颼然生鳴鳥送好音
佳時不易遇濁酒聊自斟
興盡即言返重來期抱琴

箕山

朝下黃蘆坂夕望箕山雲
緬懷巢上客想彼巖中人
弱歲慕高節壯年嬰世紛
漱流羨潁水振衣嗟洛塵
空祠

亂驚鳥山木含餘曛聊茲謝芝桂歸月及新春

西園

落日叩谿門西溪復何所人侵樹裏耕花落田中雨平
野見南山荒臺起寒霧歌舞昔云誰今人但懷古

會峰亭

山勢百里見新亭壓其巔羣峰漸靡迤高下相綿聯下
窺疑無地杳藹但蒼煙是時新雨餘衆壑鳴春泉林籟
靜彌響山光晚逾鮮巖花為誰開春去夏復妍野鳥窺

我醉谿雲留我眠日暮山風來吹我還醒然醉醒各任
物雲鳥徒留連

晚步綠陰園遂登凝翠亭

三春去已遠綠水涵新塘漸愛樹陰密初迎蕙風涼高
亭可四望繞郭青山長野色晚更好嵐曛共微茫幽懷
不可寫雅詠同誰觴明月如慰我開軒送清光

送孔生再遊河北

志士惜白日高車無停輪孔生東魯儒年少勇且仁大

軸獻公卿長裾弊街塵門無黃金聘家有白髮親寒風
入九月北渡大河津玉塞積精甲金戈耀秋雲短褐不
自暖高談吐陽春北州多賢侯待士誰最勤一見贈雙
壁再見延上賓丈夫惜不遇豈患長賤貧

留題鎮陽潭園

官雖鎮陽居身是鎮陽客北園潭上花安問誰所植春
風無先後爛熳爭紅白一花聊一醉盡醉猶須百而我
病不飲對花空歎息朝來不能歸暮者不忍摘謂言花

縱落滿地猶可席空餘綠潭水尚帶餘春色

遊瑯琊山

南山一尺雪雪盡山蒼然澗谷深自暖梅花應已繁使
君厭騎從車馬留山前行歌招野叟共步青林間長松
得高蔭盤石堪醉眠止樂聽山鳥攜琴寫幽泉愛之欲
忘返但苦世俗牽歸時始覺遠月出高峰巔

幽谷泉

踏石弄泉流尋源入幽谷泉傍野人家四面深篁竹漑

稻滿春疇鳴渠遶茅屋生長飲甘泉
陰泉栽美木潺湲無春冬日夜響山曲

秋晚凝翠亭

黃葉落空城青山遶官廨風雲淒已高
歲月驚何邁陂田寒未收野水淺生派
晴林紫榴坼霜日紅梨曬蕭疎喜竹勁
寂寞傷蘭敗叢菊如有情幽芳慰孤介
嘉客日可攜寒醅美新醅登臨無厭頻
冰雪行即屈

蟲鳴

葉落秋水冷衆鳥聲已停陰氣入墻壁百蟲皆夜鳴蟲
鳴催歲寒唧唧機杼聲時節忽已換壯心空自驚平明
起照鏡但畏白髮生

有馬示徐無黨

吾有千里馬毛骨何蕭森疾馳如奔風白日無留陰行
驅當大道步驟中五音六轡應吾手調和如瑟琴東西
與南北高下復山林惟意所欲適九州可周尋至哉人
與馬其樂不相侵

依韻奉酬聖俞二十五兄見贈之作

與君結交游我最先衆人我少既多難君家常苦貧今
為兩衰翁髮白面亦皴念君懷中玉不及市上珉珉賤
易為價玉棄久埋塵幸同居京城遠不隔重闥朝罷二
三公隨我如魚鱗君聞我來喜置酒留逡巡不待主人
請自脫頭上巾歡情雖漸鮮老意益相親窮達何足道
古來茲理均

奉答原甫九月八日見過會飲之作

老大惜時節少年輕別離我歌君當和我酌君勿辭豔
豔庭下菊與君吟繞之擷其黃金葉泛此白玉卮君勿
愛此花問君今何時秋風日益高霜露漸離披芳歲忽
已晚朱顏從此衰念君將捨我車馬去有期君行一何
樂我意獨不怡飛兔不戀羣奔風誰能追老驥但伏櫪
壯心良可悲

晚泊岳陽

卧聞岳陽城裡鐘繫舟岳陽城下樹正見空江明月來

雲水蒼茫失江路夜深江月弄清輝水上人歌月下歸
一闌聲長聽不盡輕舟短棹去如飛

奉使道中作

執手意遲遲出門還草草無嫌去時速但願歸時早北
風吹雪犯征裘夾路花開回馬頭若無一月還家樂爭
奈千山遠客愁

為客莫思家客行方遠道還家自有時空使朱顏老禁
城春色暖融怡花倚春風待客歸勸君還家須飲酒記

取思歸未得時

壽樓

碧瓦照日生青煙誰家高樓當道邊昨日丁丁斤且斲
今朝朱欄橫翠幕主人起樓何太高欲誇富力壓羣豪
樓中兒女十五六紅膏畫眉雙鬢綠日暮春風吹管絃
過者仰首皆留連應笑樓前騎馬客腰垂金章頭已白

試院聞奚琴作

奚琴本出奚人樂奚虜彈之雙淚落抱琴置酒試一彈

曲罷依然不能作黃河之水向東流鳬飛雁下白雲秋
岸上行入舟上客朝來暮去無今昔哀絃一奏池上風
忽聞如在河舟中絃聲千古聽不改可憐纖手今何在
誰知著意弄新音斷我樽前今日心當時應有曾聞者
若使重聽須淚下

初伏日招王幾道小飲

北園數畝官墻下嗟我官居如傳舍潯沱北渡馬踏冰
西山病歸花已謝落英不見空繞樹細草初長猶可藉

空園一鎖不復窺不覺芳蹊繁早夏隔牆時時聞好鳥
如得嘉客聽清話今朝試去繞園尋綠李橫枝礙行馬
蒲萄憶見初引蔓翠葉陰陰還滿架紅榴最晚子已繁
猶有殘花藏葉罅人生有酒復何求官事無了須偷暇
古云伏日當早歸況今著令許休假能來解帶相就飲
為子掃月開風榭

新霜

天雲慘慘秋陰薄卧聽北風鳴屋角平明驚鳥四散飛

一夜新霜羣木落南山鬱鬱舊可愛千仞巉巉如刻削
林枯山瘦失顏色我意豈能無寂寞泉傍菊花芳爛漫
短日寒輝相照灼無情木石尚須老有酒人生何不樂

風吹沙

北風吹沙千里黃馬行确犖悲摧藏當冬萬物慘顏色
冰雪射日生光芒一年百日風塵道安得朱顏長美好
攬鞍鞭馬行忽遲酒熟花開二月時

和聖俞感李花

昨日摘花初見桃今日摘花還見李
晴風暖日苦相催
春物所餘知有幾中年多病壯心衰
對酒思歸未得歸
不及牆根花與草春來隨處自芳菲

刑部看竹效孟郊體

花妍兒女姿零落一何速竹色君子操
猗猗寒更綠京師多名園車馬紛馳逐
春風紅紫時見此蒼翠玉凌亂
委青苔蕭疎拂華屋森森日影閑
濯濯生意足幸此接清賞寧辭薦芳醪
黃昏人去鎖空廊枝上月明春鳥宿

送公期得假歸絳

風吹積雪銷太行水暖河橋楊柳芳
少年初仕即京國故里幾歸成鬢霜
山行馬瘦春泥滑野飯天寒餽粥香
留連芳物佳節過東帶還來朝未央

歸田四時樂春夏二首

春風二月三月時農夫在田居者稀
新陽晴暖動膏脉野水泛濫生光輝
鳴鳩聒聒屋上啄布穀翩翩桑下飛
碧山遠映丹杏發青草暖眠黃犢肥
田家此樂知者誰

吾獨知之胡不歸吾已買田清潁上更欲臨流作釣磯
南風原頭吹百草草木叢深茅舍小麥穗初齊稚子嬌
桑葉正肥蠶食飽老翁但喜歲年熟餉婦安知時節好
野棠梨密啼晚鶯石榴紅轉山烏田家此樂知者誰
我獨知之歸不早乞身當及彊健時顧我蹉跎已衰老
余作歸雁亭於滑州後十有五年梅公儀來守
是邦因取余詩刻於石又以長韻見寄因以答
之

風吹城頭秋草黃仰見鳴雁初南翔秋草風吹春復綠
南鴻北飛聲肅肅城下臺邊桃李蹊憶初披荒手植之
雪消冰解草木動因記鴻雁將歸時爾來十載空遺跡
飛雁年年自南北臺傾餘址草荒涼樹老無花春寂歷
東州太守詩成美組織文章爛如綺長篇大句琢方石
一日都城傳百紙我思古人無不然慷慨功名垂百年
沈碑身後念陵谷把酒泣下悲山川一時留賞雖邂逅
後世傳之因不朽

鴨鵝詞

龍樓鳳閣鬱崢嶸深宮不聞更漏聲紅紗蠟燭愁夜短
綠窓鴨鵝催天明一聲兩聲人漸起金井轆轤聞汲水
三聲四聲促嚴粧紅靴玉帶奉君王萬年枝軟風露濕
上下枝間聲轉急南衙促仗三衛列九門放鑰千官入
重城禁鎖鎖池臺此鳥飛從何處來君不見潁河東岸
村陂闊山禽野鳥常嘲啗田家惟聽夏雞聲夜夜墮頭
耕曉月

新春有感寄常夷甫

余生本羈孤自少已非壯今而老且病何用苦惆悵誤
蒙三聖知貪得過其量恩私未知報心志已凋喪軒裳
德不稱徒自取譏謗豈若常夫子一瓢安陋巷身雖草
莽間名在朝廷上惟余欽德義久已慕恬曠矧亦有吾
廬東西止相望不須駕柴車自可策藜杖坐驚顏鬢日
摧頽及取新春歸去來共載一舟浮野水焦陂四面百
花開

憶焦陂

焦陂荷花照水光未到十里聞花香
焦陂八月新酒熟秋水魚肥鱠如玉
清河兩岸柳鳴蟬直到焦陂不下船
笑向漁翁酒家保金龜直解不須錢

贈許道人

洛城三月亂鶯飛潁陽山中花發時
往來車馬遊山客貪看山花踏危石
紫雲仙洞鎖雲深洞中有人人不識
飄飄許子旌陽後道骨仙風本仙胄
多年洗耳避世喧

獨卧寒窓聽山溜忽來顧我何慙慙笑我白髮埋紅塵
予歸為築巖前室待我明年乞得身

啼鳥

崇政後殿考試
舉人卷子作

提葫蘆提葫蘆不用沽美酒宮壺日賜新潑醕老病足
以扶衰朽百舌子百舌子莫道泥滑滑宮花正好愁雨
來暖日方催花亂發苑樹千重綠暗春珍禽綵羽自成
羣花開祇慣迎黃屋鳥語初驚見外人畫簾陰陰隔宮
燭禁漏千門何蟲蟲可憐枕上五更聽不似滁州山夢

足

閒居即事

巷有容車陋門無載酒過
池喧蛙怒雨客去雀驚羅
握臂如枝骨衰絃擊筋歌
無慘漳浦卧還似詠中阿

夜意

蕙炷爐薰斷蘭膏燭燼煎
夜風多起籟曉月漸虧弦
鵲去星低漢烏啼樹暝煙
惟應牆外柳三起復三眠

早夏鄭工部池園

夜雨殘芳盡朝暉宿霧收蘭香纔馥徑柳暗欲翻溝夏
木繁堪結春蹊翠已稠披襟楚風快伏檻更臨流

雙桂樓

嘉樹叢生秀危樓碧漢傍飛甍臨萬井伏檻出垂楊卷
幕晴雲度披襟夕籟涼山河瞻帝里風月坐胡牀愛客
東阿宴清歡北海觴淮南多雅詠歲晚翫幽芳

題張應之縣齋

小官歎簿領夫子卧高齋五斗未能去一丘真所懷綠

苔長秋雨黃葉堆空堦縣古仍無柳池清尚有蛙琴觴
開月幌窓戶對雲崖嵩少亦堪老行當與子偕

早春南征寄洛中諸友

楚色窮千里行人何苦賒芳林逢旅雁候館噪神鷗春
入河邊草花開水上槎東風一樽酒新歲獨思家

柴舍人金霞閣

簷前洛陽道下聽走轅聲樹蔭春城綠山明雪野晴雲
藏天外闕日落柳間營緩步應多樂壺歌詠太平

普明院避暑

選勝避炎鬱林泉清可嘉
拂琴驚水鳥代塵折山花
就簡刻筠粉浮甌烹霧芽
歸鞍微帶雨何惜角巾斜

題淨慧大師禪齋

巾履諸方徧莓苔一室前
萎花吟次落孤月定中圓
齋鉢都人施談機海外傳
時應暮鐘響來度禁城烟

題張損之學士蘭皋亭

碕岬接芳蹊琴觴此自怡
林花朝落砌山月夜臨池
雨

積蛙鳴亂春歸鳥弄移惟應乘興客不待主人知

送王汲宰藍田

喧喧動車馬共出古都門落日催行客東風藉酒罇樹
搖秦甸綠花入輞川繁若遇西來旅時因問故園

徽安門曉望

都門收宿霧佳氣鬱葱葱曉日寒川上青山白霧中樓
臺萬瓦合車馬九衢通恨乏登高賦徒知京邑雄

送孟都官知蜀州

名郎辭粉署佳郡出關西幾驛秦亭盡千山蜀鳥啼朱
輪照綠野尺竿覆秋畦向關應東望雲深隴樹迷

南征回京至界上驛先呈城中諸友

朝雲來少室日暮向箕山本以無心出寧隨倦客還春
歸伊水綠花晚洛橋閒誰有餘樽酒相期一解顏

廣愛寺

都人布金地紺宇歸然存山氣蒸經閣鐘聲出禁門老
杉春自綠古壁雨先昏底事幽人役偏留石蘚痕

陪府中諸官遊城南

一雨郊圻迥新秋
榆棗繁田荒溪溜入禾熟
雀聲喧燒出空槎腹
人耕廢廟垣閒追向城
客落日隱高原

智蟾上人游南岳

終日念雲壑南歸心
浩然青山入嶺路白水
望湖田野渡惟浮鉢
山家少施錢到時春尚
早收茗綠巖前

秋郊曉行

寒郊桑柘稀秋色
曉依依野燒侵河斷
山鴉背日飛行

歌採樵去荷鍾刈田歸林酒家家熟相邀白竹扉

被牒行縣因書所見呈寮友

周禮恤凶荒輶車出四方土龍朝祀雨田火夜驅蝗木
落孤村迥原高百草黃亂鷗鳴古堞寒雀聚空倉桑野
人行鱸魚陂鳥下梁晚煙茅店月初日棗林霜墜戶催
寒候叢祠禱歲穰不妨行覽物山水正蒼茫

又行處作

秋色滿郊邑人行禾黍間雉飛橫斷澗燒響入空山野

水蒼煙起平林夕鳥還嵩嵐久不見寒碧更孱顏

河南王尉西齋

寒齋日蕭索天外敞簷楹竹雪晴猶覆山窓夜自明禽
歸窺野客雲去入重城欲就陶潛飲應須載酒行

晚過水北

寒川消積雪凍浦漸東流日暮人歸盡沙禽上釣舟
離彭婆值雨投臨汝驛回寄張九屯田司錄

投館野花邊羸驂晚不前山橋斷行路溪雨漲春田樹

冷無棲鳥村深起暮煙洛陽山已盡休更望伊川

送丁元珍峽州判官

為客久南方西遊更異鄉江通蜀國遠山閉楚祠荒
油幕無軍事清猿斷客腸惟應陪主諾不費日飛觴

夏侯彥濟武陟尉

風煙接孟懷井邑富田垓河近聞冰坼山高見雨來
官閒同小隱酒美足銜盃好去東籬菊迎霜正欲開

初至夷陵答蘇子美見寄

三峽倚宮堯同遷地最遙物華雖可愛鄉思獨無聊江
水流清嶂猿聲在碧霄野簞抽夏笋叢橘長春條未臘
梅先發經霜葉不凋江雲愁蔽日山霧晦連朝斫谷爭
收漆梯林鬪摘椒巴賁船賈集蠻市酒旗招時節同荆
俗民風載楚謠俚歌成調笑捺鬼聚喧囂得罪宜投裔
包羞分折腰光陰催晏歲牢落慘驚飈白髮新年出朱
顏異域銷縣樓朝見虎官舍夜聞鶚寄信無秋雁思歸
望斗杓須知千里夢長繞洛州橋

春雪

逗曉風聲惡。褰簾雪片斜。應憐未歸客。故剪欲開花。病
思寒添睡。春愁夢在家。誰能慰寂寞。惟有酌流霞。

謁廟馬上有感

旌旆曉悠悠。行驚歲已遒。霜雲依日薄。野水帶冰流。富
庶齊三服。山川禹九州。自憐思潁意。無異旅人愁。

送趙山人歸舊山

屈賈江山恨不休。霜飛翠葆忽驚秋。吟拋楚國蘭苔思。

歸有淮南桂樹留聒耳春池蛙兩部比封秋塢橘千頭
嗔條怒穎真堪愧莫染衣塵更遠游

傷春

蕙蘭蹊徑失芳期風雨宵深怯減衣卷箔高樓驚燕入
揮絃遠目送鴻歸荔催釀蜜愁花盡柳撲暄條妬雪飛
欲識傷春多少恨試量衣帶付腰圍

公子

黃山開苑獵初回絳樹分行舞遞來下馬春場雞鬪距

鳴弦日圃雉驚媒犀投搏齒呼成白橋隔車音聽似雷
不問春蠶眠未起更尋桑陌到秦臺

送目

送目衡臯望不休江蘋高下徧汀洲長堤柳曲妨搔首
小苑花深礙倚樓楚徑蕙風消病渴洛城花雪蕩春愁
流杯三日佳期過擲度蘭陂負勝游

劉秀才昉宅對奕

烏巷招邀謝墅中紫囊香佩更臨風塵驚野火遙知獵

目送雲蘿但聽鴻六著比犀鳴博勝百嬌將矢捧壺空
解衣對子歡何極玉井移陰下翠桐

奉送叔父都官知永州

虎頭盤綬早垂紳青組名郎領郡新畫鷁千艘隨下瀨
聽雞五鼓送行人楚波漾處萍如日淮月開時蚌有津
千里壺漿民詠溢檣烏旗隼下汀蘋

柳

綠樹低昂不自持河橋風雨弄春絲殘黃淺約眉雙斂

欲舞先誇手小，垂立馬折鞍。
催遠道落梅橫笛，共餘悲
長亭送客，兼迎雨費，盡春條贈別離。

即日

李徑陰森接翠疇，押簾風日澹清秋。
晚烏藏柳棲殘照，遠燕傷風失故樓。
星漢經年雖可望，雲波千疊不緘愁。
平居革帶頻移孔，誰問無憀沈隱侯。

送友人南下

河橋別柳減春條，隔浦琴音聽已遙。
千里羹尊誇敵酪，

滿池漉稻欲鳴蜩東風楚岸神靈雨殘月吳波上下潮
如弔湘纍辜杜若秋江斜日駐蘭橈

宿雲夢館

北雁來時歲欲昏鄉書歸夢杳難分井桐葉落池荷盡
一夜西牕雨不聞

寄題嵩巫亭

平地煙霄向此分繡楣丹檻照清芬風簾暮捲秋空碧
剩見西山數嶺雲

琵琶亭

樂天曾謫此江邊已嘆天涯涕泣然今日始知余罪大
夷陵此去更三千

初至虎牙灘見江山類龍門

曉鼓潭潭客夢驚虎牙灘上作船行山形酷似龍門秀
江色不如伊水清平日兩京人少壯今年三峽歲崢嶸
卧聞乳石淙流響疑是香林八節聲

送致政朱郎中

平生不省問田園白首忘懷道更尊已納印章辭北闕
稍留冠蓋餞東門馮唐老有為郎戀疎廣終無任子恩
今日榮歸人所羨兩兒腰綬擁高軒

棖子

嘉樹團團俯可攀壓枝秋實漸瀾斑朱欄碧瓦清霜重
粲粲繁星綠葉間

行次壽州寄內

紫金山下水長流嘗記當年此共遊今夜南風吹客夢

清淮明月照孤舟

西湖泛舟呈運使學士張揆

波光柳色碧溟濛
曲渚斜橋畫舸通
更遠更佳惟恐盡
漸深漸密似無窮
綺羅香裏留佳客
絃管聲來颺晚風
半醉迴舟迷向背
樓臺高下夕陽中

過塞

身驅漢馬踏邊霜
每嘆勞生祇自傷
氣候愈寒人愈北
不如征雁解隨陽

送石揚休還蜀

長愛謫仙誇蜀道送君西望重吟哦
路高黃鵠飛不到花發杜鵑啼更多
清禁寒生鳳池水繡衣榮照錦江波
昔年同舍青衿子夾道歡迎鬢已皤

久在病告近方赴直偶成拙詩二首

經時移病久端居玉署新秋此直廬
夜靜樓臺落銀漢人間鈴索少文書
江湖未艾年華晚燈火微涼暑雨初
敢向聖朝辭寵祿多慚清禁養慵疎

其二

清晨下直大明宮
馳馬悠然宿霧中
金闕雲開滄海日
天街雨後綠槐風
歲華忽忽雙流矢
鬢髮蕭蕭一病翁
名在玉堂歸未得
西山畫閣興何窮

春日詞

宮壇春陌賽牛回
玉琯東風逗曉來
不待嶺梅傳遠信
剪刀先放綵花開

試粉東牕待曉回
共尋春柳傍香臺
不驚樹裏禽初變

共喜釵頭燕已來

待曉銅荷剪蠟燭繡簾春色犯寒來
畫眉不待張京兆自有新粧試落梅

雁

來時沙磧已冰霜飛過江南木葉黃
水闊天低雲暗澹朔風吹起自成行

釣者

風牽釣線裊長竿短笠輕蓑細草間
春雨濛濛看不見

水煙埋却面前山

余昔留守南都得與杜祁公唱和詩有答公見
贈二十韻之卒章云報國如聿願歸耕寧買田
期無辱知己肯逐利名遷逮今二十有二年祁
公捐館亦十有五年矣而余始蒙恩得遂退休
之請追懷平昔不勝感涕輒為短句寘公祠堂
掩涕發陳編追思二十年門生今白首墓木已蒼煙報
國如聿願歸耕寧買田此言今始踐能不愧黃泉

贈潘道士

門無車轍紫苔侵
雞犬蕭條陋巷深
寄語彈琴潘道士
雨中尋得越江吟

初出真州泛大江作

孤舟日日去無窮
行色蒼茫杳靄中
山浦轉帆迷向背
夜江看斗辨西東
漉田漸下雲間雁
霜日初丹水上楓
蓴菜鱸魚方有味
遠來猶喜及秋風

戲答元珍

春風疑不到天涯二月山城未見花殘雪壓枝猶有橘
凍雷驚笋欲抽芽夜聞歸雁生鄉思病入新年感物華
曾是洛陽花下客野芳雖晚不須嗟

夷陵書事寄謝三舍人

春秋楚國西偏境陸羽茶經第一州紫籀青林長蔽日
綠叢紅橘最宜秋道塗處險人多負邑屋臨江俗善游
臘市漁鹽朝暫合淫祠蕭鼓歲無休風鳴燒入空城響
雨惡江崩斷岸流月出行歌聞調笑花開啼鳥亂鉤輈

黃牛峽口經新歲
白玉京中夢舊游
曾是洛陽花下客
欲誇風物向君羞

寄梅聖俞

青山四顧亂無涯
雞犬蕭條數百家
楚俗歲時多雜鬼
蠻鄉言語不通華
繞城江急舟難泊
當縣山高日易斜
擊鼓踏歌成夜市
邀龜卜雨趁燒畬
叢林白晝飛妖鳥
庭砌非時見異花
惟有山川為勝絕
寄人堪作畫圖誇

寄子山待制二絕

留滯西山獨可嗟
殘春過盡始還家
落花縱有那堪醉
何況歸時無落花

聞君屢醉賞紅英
落盡殘花酒未醒
嗟我落花無分看
莫嫌狼藉掃中庭

寄秦州田元均

由來邊將用儒臣
坐以威名撫漢軍
萬馬不嘶聽號令
諸蕃無事著耕耘
夢回夜帳聞羌笛
詩就高樓對隴雲
莫忘鎮陽遺愛在
北潭桃李正氛氲

寄劉都官

別後山光寒更綠
秋清酒美色仍清
繞亭黃菊同君賞
獨對殘芳醉不成

書王元之畫像側

偶然來繼前賢迹
信矣皆如昔日言
諸縣豐登少民事
四時遊覽荷君恩
想公風采常如在
顧我文章不足論
名姓已光青史上
壁間容貌任塵昏

豐樂亭遊春

紅樹青山日欲斜長郊草色綠無涯遊人不管春將老
來往亭前踏落花

金鳳花

憶繞朱欄手自栽綠叢高下幾番開中庭雨過無人迹
狼藉深紅點綠苔

憶滁州幽谷

滁州幽谷抱千峯高下山花遠近紅當日辛勤皆手植
而今開落任春風主人不覺悲華髮野老猶能說醉翁

誰與援琴親寫取夜泉聲在翠微中

又和梅聖俞元夕登東樓

憑高寓目偶乘閒袷服遊人見往還
明月正臨雙闕上行歌遙聽九衢間
黃金絡馬追朱憶紅燭籠紗照玉顏
與世漸疎嗟老矣佳辰樂事豈相關

出省有日書事

凌晨小雨壓塵輕閒憶登高望禁城
樹色連雲春泱泱風光著草日清明
看榆吐莢驚將落見鵲移巢忽已成

誰向兒童報歸日為翁寒食少留錫

唐崇徽公主手痕和韓內翰

故鄉飛鳥尚啁啾何況悲笳出塞愁青塚埋魂知不返
翠崖遺迹倩誰留玉顏自古為身累肉食何人與國謀
行路至今空嘆息巖花澗草自春秋

夜宿中書東閣

翰林平日接羣公文酒相歡慰病翁白首歸田徒有約
黃扉論道愧無功攀髯路斷三山遠憂國心危百箭攻

今夜靜聽丹禁漏尚疑身在玉堂中

送王學士赴兩浙轉運

漢家財利析秋毫暫屈清才豈足勞
邑屋連雲盈萬井舳艫銜尾列千艘
春寒欲盡黃梅雨海浪高翻白鷺
濤平昔壯心今在否江山猶得助詩豪

送道州張職方

桂籍青衫憶共遊憐君華髮始為州
身行南雁不到處山與北人相對愁
莫為高才輕遠俗當令遺老識賢侯

三年解組來歸日
吾已先耕潁水頭

石倉歷代詩選卷一百四十